

Allannguutissatut siunnersuut

uunga

Ilinniagaqarnersiutit pillugit Inatsisartut inatsisaata allanngortinneqarnissaanik Inatsisartut inatsisissaattut siunnersuut

Aappassaaneerinermit atatillugu Naalackersuisunit saqqummiussaq.

§ 1-imut

1. § 1, nr. 3, imatut oqaasertalerneqassaaq:

”3. § 20 -p kingorna ikkunneqassaaq:

”§ 20 a. Ilinniagaqarnersiutit attartukkat ernialersorneqarnerat aallartissaaq piffissamit ilinniagaqarnersiutininik akiliuteqarfiusumiit.

Imm. 2. Ernialersuineq piffissami pineqartumi ilinniagaqarnersiutininik attartukkanit akiligassaalersimasut ernialernerattut pisassaaq.

Imm. 3. Ernialersuineq tunngaveqassaaq erniamik atuuttumik pisortatigoortumik diskonto annertussusianik ilassuserlugu 1 procentimik, taamaattoq annertunerpaamik 5 procentimut, ilinniagaqartunut ilinniarnerminnik ingerlatsisunut.

Imm. 4. Ernialiineq pisassaaq ukiut tamaasa ulloq 31. december, imaluunniit piffissami akiitsut akilerneqarfianni.””

2. § 1-imi, nr. 6-imi, § 31 imatut oqaasertalerneqassaaq:

”§ 31. Tapiissutit 50 procentiussapput qinnuteqartup ukiumi akiliiffiusussami akilersimasaanit, apeqqutaassananilu akiliutigineqartut akiitsunut akilersuinerunersut imaluunniit erniaanersut.

Imm. 2. Imm. 1-imi akiliutip pineqartup saniatigut ilassutitut 50 procentinik tapiissuteqartoqaqqissinnaavoq, ilinniagaqartup ilinniarnini kingusinnerpaamik naammassiffissaa ukiumik ataatsimik qaangerlugu naammassisimappagu.

Imm. 3. Namminersorlutik Oqartussanut ilinniagaqarnersiutisianit akiitsut ilanngartsernissaannut tapiissutit pisassapput akiitsut tapiissutigineqartunik annikillinerisigut.

Imm. 4. Danskil naalagaaffiannut ilinniagaqarnersiutininik attartukkanut akiliutissatut tapiissutit danskil naalagaaffiannut tapiissutaasunik akiliinikkut pisassaaq.

Imm. 5. Naalackersuisut qinnuteqartoqarnera tunngavigalugu imm. 2-mi aalajangersakkap saneqqunneqarnissaanut akuersissuteqarsinnaapput, ilassutitullu tapiissutininik 50 procentinik tunniussaarsinnaallutik, ilinniagaqartup uppersarpagut kinguaattoorneq pissutissaqartoq, tamatumani aamma napparsimarulunneq, ilinniagaqartumut nammineq akisussaaffigitinneqarsinnaanngitsoq pineqarpat.”

Imm. 6. Naalackersuisut malittarisassiorsinnaapput allanik 50 procentinik ilassutitut tapiissuteqaqqissinnaanermut piumasaqaataasussanik, imm. 2-mi aalajangersakkamik naammassinngitsunut atuuttussanik.”

Allannguutissatut siunnersuummut nassuiaatit

Nalinginnaasumik nassuiaatit

Siunnersuutip siullermeerneqarneranut atatillugu partiit arlallit oqaatigaat ernummatigalugu siunnersuummi Inatsisartut inatsisaanni § 31-mut oqaasertaliussassatut siunnersuut. Tassani aalajangersarneqarpoq qanoq annertutigisunik tapiissuteqartoqarsinnaanersoq ilinniagaqarnersiutinik attartukkanik utertitsilluni akilersuineranut. Aalajangersarneqarpoq akiliutigineqartup 50 procentinik tapiissuteqartoqartassasoq, tapiissutillu taakkua qaffanneqarsinnaasut suli aamma 50 procentinik allanik, ilinniagaqartup ilinniarnini piffissaliussaasup iluani naammassisimappagu, imaluunniit ilinniagaqartup ilinniarnini naammassisimappagu ukiut aalajangersimasut angunnginneranni, ilinniakkap suunera apeqputaatillugu. Aalajangersagaq siunnertaqarsimavoq ilinniagaqartup kaammattornissaanik ilinniagaqarnermut piffissaliussaasup iluani ilinniarnermik naammassininnissamik, imaluunniit ukiuliussatut aalajangersarneqartut iluanni, taamaaliornikkut ilinniakkat inuiaqatigiinni sukkanerusumik sivisunerusumillu iluaqutigineqarsinnaaqqullugit, pineqartup suliffeqarnermiit soraarninngorluni tunuannginnerani. Aalajangersagaq taamaasilluni isigineqartussaavoq inuiaqatigiit aningaasarsiornikkut imminnut napatissinnaanerulernissaannut suliniutaasut ilaattut.

Tamatunngalu ilaliullugu Naalackersuisut allannguutissatut siunnersuut ukua suliarisimavaat, uanilu aallaqqaammut aalajangersagassatut siunnersuutaasumiit tapiissutit qanoq ukioqarnermut tunngasumik aaqiivigineqartarnissaannut aalajangersagaq ilinniakkanut aalajangersimasunut agguaassamik peerneqarsimavoq. Allannguutissatullu siunnersuutip aamma kingunerissavaa 50 procentimik ilassutitut tapiissuteqartarnissami piumasaqaataassammat ilinniagaqartup ilinniakkani piffissaliuussaasup iluani naammassisimassagaa. Siunnersuutaqqaartumullu sanilliullugu ilinniagaqartoq ilassutitut 50 procentinik tapiissutisisinnaassaaq, ilinniagaqartup ilinniarnerninut piffissaliuussaasumik ukioq ataaseq sinnerlugu qaangiisimannikkuni. Allannguutissatut siunnersuut taakkua saniatigut aalajangersakkamik pisinnaatitsissummik imaqarpoq, taamalu Naalackersuisut nalunaarusiornikkut malittarisassiorsinnaassallutik piumasaqaatinik allanik imaqartumik, ilassutitut 50 procentimik ilinniagaqartunut imm. 2-mi aalajangersakkamik naammassinissimannngitsunut tapiissuteqarsinnaanermut, piffissaliussaasoq ukiumik ataatsimik qaangernagu ilinniagaq naammassineqarsimatillugu atortinneqartussamik.

Kiisalu aamma allannguutissatut siunnersuummi ernialersuineq qummut killissalerneqarpoq, ilinniagaqartup suli ilinniarnerninik ingerlatsineranut piffissamut atatillugu. Taanna

aalajangersagaq ilanngunneqarpoq qularnaarumallugu ilinniagaqartut ilinniartuunerminni erniat annertuumik qaffannerannik eqqorneqartannginnissaat.

Naalakkersuisut pingaarnertut nalilerpaat allannguutissatut siunnersuutit naammassinnittut ilinniagaqarnersiutit inuiaqatigiinni aningaasarsiernerup piujuaannartitsinermik tunngavilimmik ingerlatsinermut tapersersuinerannut, inissaqartitsisinnaajumalluni suliniutinillu ineriartortitsisinnaajumalluni ilinniagaqartut ilinniakkamik aallartitsisarnissaannut naammassinnittarnissaannullu. Ilutigisaanillu allannguutissatut siunnersuutit naapigiaanerupput siullermeerinninnermi ernummatinut oqaatigineqartunut tunngatillugu.

Siunnersuummut siullermeerneqartumut sanilliullugu aalajangersakkamut akiitsunik akilersuinermi 50 %-imik tapiissuteqartarsinnaanermut tunngatillugu sakkukinnerulersitsineq kinguneqassaaq ilinniagaqartut 25 procentit missaannik amerlanerusut akiitsuminnik akilersuinissaminut 100 % -imik tapiiffigineqartalernissaat.

Aningaasaqarnikkut kingunerisassai eqqarsaatigalugit naatsorsuutigineqarpoq allannguutissatut siunnersuutit Namminersorlutik Oqartussat sipaarutissarisinnaasaannik annikinnerulersitsissasut ukiumut 1 mio. kr.-it missaannut, siunnersuummi siullermit sipaarutissanut 2 mio. kr.-it missaanniittunut sanilliullugu.

Ilinniagaqartunut ilinniarnerminnik ingerlatsisunut ilinniagaqarnersiutinik attartorsimasunut qaffasinnerpaamik erniarititassap qaffasinnerpaaffissalernerneqarnera maanna diskonto-p erniaanut siunnersuummut siullermit sanilliullugu allannguinnigilaq. Diskonto-p erniaa 4 %-i sinnerlugu annertussuseqarpat aaqqissuussineq erniatigut 350.000 kr.-it missaannik annaasaqarnermik kinguneqartassaaq, maanna ilinniagaqartut ilinniagaqarnersiutinut akiitsui aallaavigigaanni siunnersuutaaqqaartumut sanilliullugu. Diskonto-p erniaa 4 %-i sinnerlugu annertussuseqarpat ukiut arlariiaat iluanni aamma erniat erniaasigut annaasaqartoqassaaq.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Aalajangersakkap kinguneraa ernianik 5 procentinik annerpaamik ilanngussisoqarsinnaammat piffissami ilinniagaqartup ilinniartuunerata nalaani. Ilinniagaqartuuneq pillugu apeqqut tamatumunnga malittarisassat nalinginnaasut naapertorlugit aalajangerneqartassaaq, takuuk inatsimmi maanna atuuttumi § 2, imm. 1, nr. 2, aamma Namminersorlutik Oqartussat ilinniagaqarnersiuteqarnermut nalunaarutaat. Aalajangersakkap kingunerisaanik qaffasinnerpaamik ernianik 5 procentit ilanngunneqarsinnaapput piffissamiit ilinniagaqartup ilinniarnernik unititseqqaareerluni aallartitseqqinneraniit. Tamannalu aamma isumaqarpoq ernianik

ilangussisoqarsinnaangimmat 5 procentinit qaffasinnerusunik, ilinniagaqartup ilinniartuunerata nalaani, naak diskonto-p 4 procenti qaangeraluaraa.

Nr. 2-mut

Aalajangersakkap kinguneraa siunnersuutigineqartoq aalajangersagaq ilinniagaqarnersiutunik attartukkanik akilersuinissamut tapiissuteqartarnerup ilinniakkat suuneri qanorlu ilinniagaqartup ukioqarnera tunngavigalugu naatsorsorneqartarnissaat atorunnaarsinneqarmat. Tamatumalu saniatigut malittarisassaq allangortinneqarpoq, suli ilassutitut 50 procentinik ilinniagaqarnersiutitut attartukkanut taarsersuinissamut tapiissuteqartoqarsinnaaneranut atuuttoq, ilinniagaqartup ilinniagaqarnini piffissaliuussaasup iluani naammassisimappagu. Taamaasilluni ilinniagaqartup piffissaq ilinniagaqarfigisassani ukioq ataaseq angullugu qaangersinnaavaa, sulilu ilassutitut 50 procentinik taarsersuinerminut ukiumi akiliiffigisamini tapiiffigineqarsinnaassalluni.

Allannguutissatut siunnersuullu aamma imaqarpoq pisinnaatitsissutitut aalajangersakkamik, imm. 6-imi. Aalajangersagaq taanna naapertorlugu Naalackersuisut nalunaarusiorsinnaapput, ilinniagaqartup ukiumi akiliiffissamini akiliutaasa 50 procentinik ilassutitut tapiissutisisinnaaneranut aalajangersakkanik. Aalajangersakkat assersuutigalugu tassaasinnaapput malittarisassat ilinniagaqartup ilinniagaqarsinnaanermut misilitseernermini piginnaasaqarfiulersumik ilinniagaqarsinnaanera. Aaqqissuussineq taamaasilluni inuiaqatigiinni pisariaqartitsinernik tunngavilimmik tapiissuteqarsinnaanermut qiimmassaataavoq.